

MAXIMES 5
MORALES,
ET CHRESTIENNES,

POVR LE REPOS DES CONSCIENCES
dans les affaires presentes.

*Pour servir d'instruction aux Curez, aux Predicateurs
& aux Confesseurs.*

Dressées & enuoyées de S. Germain en Laye, par un
Theologien, fidele Officier du Roy.

A MESSIEVRS DV PARLEMENT.



A PARIS,
Chez CARDIN BESONGNE, ruë d'Escoffe,
pres saint Hilaire.

M. DC. XLIX.
AVEC PERMISSION.

IN OLYMPIA

THE


OLYMPIAN

OF

OLYMPIA

THE

OLYMPIAN



A

MESSEIGNEVRS DV PARLEMENT.

ESSEIGNEVRS,



L'excez de la douleur, que comme Chrestien, & bon François, ie souffre dans le cœur, à la Venë des miseres, dont les peuples sont accablez il y a si long-temps; & qui par un desordre du tout estrange, augmentent tous les iours, au lieu de prendre fin, m'oblige de vous dire avec le respect qui est deu à vostre autorité, que c'est maintenant que vous voyez avec desplaisir les succez funestes & deplorables des mauuaises maximes que vous auez tolerées, pour ne les auoir pas punies comme vous pouuiez. Si vous auez tesmoigné du courage à destruire ces morales pernicieuses, lors que des corps entiers, & celebres vous en ont apporté leurs plaintes, vous ne seriez pas peut-estre, avec Paris, dans l' apprehension de la peine où vous estes; ny toute la France dans le peril de sa ruine, si Dieu par sa misericorde ne luy rend la main pour la soustenir. Comme il n'y a point de semence qui ne germe en sa saison, ny d'arbre qui ne fructifie en son temps, les plus sages preuoioient bien qu'il ne falloit point attendre d'autre fruit, que celuy dont nous goutons l'amertume, de la doctrine damnable de tant de faux Casuistes, qui employent toutes leurs réveries pour changer les crimes en vertus, canonizer les duels, les meurtres & les adu'teres, & mettre les Rois & leurs Estats en proye à la conuoitise & à la violence des Estrangers, & des mauuais subietts. Dans ce grand incendie qui commence sur vous-mesmes, i'apporte vn peu d'eau pour tascher à l'esteindre, par des maximes Euangeliques, qui mettront le calme dans l'esprit, & animeront les cœurs de tous les vrais Chrestiens & veritables François, & que i'aurois fait approuuer par toute la Sorbon-

ne, si leur verité estoit moins claire qu'elle n'est pas. Le caractere que ie porte dans l'Eglise & dans la Theologie, leur feroit vne education suffisante si ie disois mon nom, dont ie me retiens par la seule consideration du service que ie rends à sa Majesté; de l'honneur duquel ie serois priné au moment que ie me serois déclaré. Si cét essay vous touche, & fait le fruit dans le public que ie me promets, qu'il fera avec la grace de nostre Seigneur, ie donneray en suite les maximes qui concernent l'establissement la direction & le manient des Finances, matiere peu entendue & plus mal pratiquée, & qui n'est pas peu necessaire dans la corruption de ce siecle, pour le soulagement des miseres publiques.



MAXIMES MORALES
& Chrestiennes pour le re-
pos des Consciences dans
les affaires presentes.

POVR SERVIR D'INSTRVCTION
aux Curez , aux Predicateurs
& aux Confesseurs.

DANS ce mal-heureux temps ou il paroist ma-
nifestement que la cholere de Dieu est allu-
mee contre les hommes ; Dans ce siecle de fer
de sang & de feu ; où selon l'Euangile , nous auons
toutes les marques qui doiuent preceder le iour
espuouentable du Iugement vniuersel ; Mon esprit de-
meure estonné de ce que chacun se met en peine pour
les choses qui regardent la conseruation du corps qui
doit mourir , & il sèble qu'on méte en oubli cete prin-
cipale partie de l'homme , qui portât l'image de Dieu
doit viure eternellemēt , ou biē-heureuse ou malheu-
reuse. Depuis 3. semaines en ça no^s ne voions que des
escrits fondez sur des maximes de la politique pour la
defense de l'estat contre les desseins tyranniques d'un
Estranger méconu aussi bien qu'inconnu. Les Presses
des Imprimeurs gemissent iour & nuict pour exprimer
les gemissémés des miserables sous l'opression decete

sangsüë Sicilienne: & personne n'a encore pensé à takt-
 ter le poin& principal qui est celuy de la conscience, pour
 iustifier la iustice des armes publiques, contre ce pertur-
 bateur du repos public; comme si Paris, qui est l'esprit
 & l'elixit de la Religion Chrestienne, estoit deuenü sans
 foy ou sans Dieu, depuis que cet Estranger a apporté en
 France la Religion & la creance de Machiauel. On en
 fera tel iugement que l'on voudra, neantmoins la paro-
 le de Dieu sera tousiours veritable; Que les edifices en
 sont que des ruines où Dieu n'a pas posé les fondemens:
 que les maximes de l'Euangile, non celles de la Politi-
 que sont ce cardou à trois branches qui ne peut estre rom-
 pu; Et ie connois mille ames timorées qui sont en suspès,
 & ne scauēt à quoy se resoudre, pour n'estre point esclair-
 cies selon les Regles de la Theologie, sur le iuste subiet
 qu'a non seulement Paris; mais toute la France de se sou-
 leuer & de prendre les armes pour chasser cet ennemy
 du Roy & de son Estat. C'est en faueur de ces ames pieu-
 ses dans lesquelles vne crainte filiale fait abhorrer comme
 la mort les ombres mesme du peché, que ie prens la
 plume à la main, afin de calmer leur apprehension, &
 mettre leur conscience en repos dans le trouble & l'ora-
 rage de ces monuments, ce que ie feray par l'establisse-
 ment de quelques maximes Chrestiennes & Euangeli-
 ques, que ie me contenteray d'expliquer briefuement,
 sans apporter les authoritez, pour ne faire pas vn liure
 au lieu d'vne consultation.

I

La premiere Maxime Chrestienne qu'il faut poser
 dans certe conioncture, qui est comme la base & le
 fondement de toutes les autres, & sans laquelle au-
 cun ne se peut dire veritable Chrestien, est l'honneur,
 la reuerence, & le respect que l'on doit au Roy. Car
 l'autorité Royale estant d'institution diuine, quoy
 que plusieurs Roys ne soient que de celle des hom-
 mes, ce caractere de la maiesté de Dieu, qu'ils por-

tent avec tant d'esclat, exige necessairement de leurs subiets des respects conformes à cette grandeur ; & cette Loy d'obligation d'honneur enuers les Souuerains, passe par proportion dans toute sorte d'inférieurs à l'endroit de ceux qui leurs sont preposez : & ainsi les Magistrats sont venerables par le caractere de la puissance de Dieu qu'ils exercent sous l'autorité du Roy, quand d'ailleurs ils ne le seroient pas par le defect de leur conduite particuliere.

II

De cette premiere maxime vient la seconde qui est l'obeissance que l'on doit au Roy, non pas au cugle, comme on le voudroit persuader faullement : mais conformement aux Loix de Dieu, aux Regles de l'Euangile & de l'Eglise Catholique Apostolique & Romaine. Car comme les Roys sont les Lieutenans de Dieu pour la conduite temporelle des hommes, c'est de luy & non pas d'eux mesme qu'ils doiuent prendre les Loix & les Ordonnances necessaires pour leur conseruation, & comme l'Ame est plus pretieuse que le corps, & l'interest du salut preferable à celuy de la fortune, les maximes de nostre Religion doiuent estre les regles de celle de la Politique. Si bien que tant que les Roys commandent des choses qui ne choquent point le salut, les suiets sont tenus d'obeyr, mais des lors qu'ils passent ces bornes, Sainct Pierre nous apprend la responce que nous deuous faire, qu'il n'y a point d'apparence de rendre de l'obeissance aux hommes, au preiudice de celle que nous deuous à Dieu.

III

Cette obeyssance & ces respects n'obligent point les peuples à l'endroit du Conseil, des Ministres & des Fauoris : Car c'est vne Theologie incogneue à l'antiquité qu'on nous à voulu faire passer depuis quelques années par les artifices du deffunct Cardinal de

Richelieu, de declarer crimes de leze-Maiefté les fautes commises à l'endroit des fauoris & des Ministres qu'on appelle d'Estat. Nous ne trouuons pas cette maxime dans l'Euangile, nul des Conciles ne l'a establie, aucun des Peres ne l'a enseignee, ce n'est que l'effect d'un faste par trop orgueilleux; autrement il faudroit dire qu'il y auroit plusieurs Roys dans vn Royaume, si les mesmes deuoirs qu'on rend au Souuerain estoient rendus à leurs Ministres.

IV

Ces mesmes deuoirs n'obligent point par égale obligation enuers les personnes preposées à la regence de l'Estat, durant la minorité des Roys. Car encore que les Regents ou Regentes, soient d'une condition plus releuee & dans vn estat plus sublime que celuy des Ministres, ils sont neantmoins tousiours dans vn ordre extremement inferieur a celuy de la dignité Royale, & tout ce qu'on leur doit dans cette qualité n'est que la deference que deuroit rendre vn seruiteur a celuy qui seroit le Tuteur de son maistre. C'est pourquoy ie remarqueray en passant le zele indiscret, ou pour mieux dire ignorant, de quelques vns, qui au commencement de ceste regence, auoient fait adiouster dans l'oraison que l'on fait pour le Roy, apres ces paroles, *pro Rege nostro Ludonico*; ces autres, & *pro Anna Regina nostra*. Car le Royaume de France ne tombe point en quenouille, & sa souueraineté ne se partage point entre deux avec vn pouuoir egal.

V

De la vient que les Regents ou Regentes, ny tout leur Conseil Ministres, & Fauoris, n'estans pas souuerains, ne peuuent point durant leur regence & la minorité des Roys faire aucun changement, ny establissement, qui aye force de Loy. Car la puissance de faire des Loix est vn effet de l'autorité absoluë, qui reside dans la seule personne du Prince. & incommunicable

9
communicable à qui que ce soit, de maniere que les Regents n'estant que tuteurs à proprement parler, ils n'ont que le droit de conseruer, non pas de destruire, de changer ou d'innoüer. Si bien qu'ils ne peuuent faire aucunes Loix, ny Ordonnances, ny aucune creation d'Offices, qui sont toutes fonctions de Roy majeur & independant. Et il y a lieu de s'estonner comment les Cours souueraines ont toleré des creations d'Offices durant la minorité du Roy, lesquels il pourra casser sans faire iniure à personne estant deuenu majeur, puis que c'est faire le souuerain & entreprendre sur l'authorité inseparable de sa personne que de mettre des nouveaux Officiers dans son Estat. Aussi la derniere declaration procuree par le Parlement pour le soulagement du peuple, & dont l'infraction, est cause de tous ses mouuements, n'est pas vne forme de Loyny d'Ordonnance nouvelle, mais vne correction des defauts & suppression des abus qui estoient glissez insensiblement contre les Loix & les Ordonnances, au preiudice des suiets du Roy, par l'auarice & l'irreligion non seulement des Ministres d'Estat, mais encor d'une infinité de petites sangsues qui ne se pouuoient saouler du sang de leurs freres.

VI

Il y a obligation en tous les suiets à prier Dieu pour le Roy. C'est vn deuoir que nous apprenons du diuin Apostre, c'est l'usage de toute l'Eglise qui en fait memoire dans le plus sublime de ses misteres en nommant la personne des Roys dans l'auguste sacrifice du Corps de Iesus-Christ, & cette coustume à esté si religieusement & inuiolablement obseruée dans toute l'Eglise des sa naissance, que les premiers Chrestiens ne laissoient pas de faire memoire dans leurs assemblees & prieres publiques des Empereurs Payens & qui les persecuroient : sollicitant incessamment la misericorde de Dieu pour leur conuersion & le repos

de leur Estat, dans la prosperité duquel ils trouuoient la leur, & le soulagement de l'Eglise.

VII

En suite de l'obligation de prier, qui est vne fonction du cœur, vient celle du corps & des biens de fortune par laquelle les suiets sont obligez d'employer l'vn & l'autre pour la conseruation de la personne du Roy & la manutention de son Estat. De cela outre les raisons qui seruent d'appuy aux maximes precedentes, il y en a encore deux particuliers extrêmement pressantes. L'vne que comme les enfans sont obligez par la loy de nature d'employer ce qu'ils ont & de vie & de biens pour la protection de leur pere & la conseruation de sa famille; peronnne ne peut reuoker en doute que cette mesme loy ne passe dans les peuples, pour leur apprendre ce qu'ils doiuent à leur Prince & à l'Estat, à moins que de renoncer au sens commun & dire que les Roys ne sont pas les peres de leurs suiets. L'autre raison regarde les interrests de chaque particulier, car comme tout vn estat n'est qu'un corps dont le souuerain est le chef, vne partie ne peut souffrir que l'autre ne participe à sa douleur: ainsi comme tous les peuples ont vne liaison avec le Prince dont les interrests ne se peuuent separer, il n'y a personne dans l'Estat qui par la consideration de ses interrests propres ne soit obligé d'employer corps & biens pour la conseruation de ceux du public dans lequel tous les particuliers sont essentiellement engagez. Il n'y a qu'une chose à obseruer en tel rencontre qui est, que l'assistance de corps & de biens qui se doit faire pour la personne du Roy, ou le bien de l'Estat, doit estre selon la condition des personnes & au prorata de leurs facultez au sol la liure tous y estans esgalement obligez: De sorte que c'est vn abus deplorable & dont les Confesseurs rendront compte à Dieu, ce que nous auons veu en Fran-

ce depuis vingt-ans, que les vns au lieu de contribuer aux frais de la guerre, se sont seruis de ces occasions funestes pour s'enrichir & se gorger de biens, du sang de leurs freres; dequoy nous parlerons lors que nous traiterons des maximes Chrestiennes touchant la direction des finances.

VIII.

La force & l'obligation de cette Loy ne regarde pas seulement les ennemis externes & estrangers, qui a main armée & à guerre declarée s'efforcent d'enuahir l'Etat; Mais encore s'estend contre les ennemis internes & cachez & contre tous ceux, qui par rebellions, trahisons, monopoles, vols, larcins, vexations, & par quelque autre voye que ce soit, secrette ou manifeste, causent du detrimet ou au Prince, ou au bien public; Et sans doute outre la creance, la raison naturelle nous enseigne cette verité. Car quelle louange donneroit on à vn enfant qui employeroit tous ses soins, pour garantir la maison de son pere de l'incurfion des Voleurs, si cependant il souffroit quelle fust pillée deuant ses yeux par la desbauche d'vn sien frere, ou par la perfidie d'vn seruiteur? & quelle obligation luy auroit son pere d'auoir chassé les Estrangers, s'il le voyoit les bras croisez considerer les rauages que luy causeroient des enfans dénaturez, ou des domestiques ingrats, plus grands peut estre & pires que tous ceux qui luy pourroient estre faits par des ennemis declarez? Est c'est en ce point ou plusieurs se trompent, se persuadant qu'il n'y a point d'obligation d'assister le Prince de sa personne & de ses biens que contre les ennemis estrangers ou rebelles declarez: & cependant voyent tous les iours les volleries publiques, les rauages & les ruines de la Iustice & des facultez d'vn Estat, sans en estre touchez, pour ne dire peut-estre qu'ils les approuuent, les tolerent & les entretiennent.

Or qu'ils sçachent qu'ils sont également obligez de s'opposer aux vns & aux autres, que les mauuais domestiques ne sont pas moins punissables que les Estrangers; Et par la comparaison que nous venons de rapporter qu'il n'y a pas moins d'obligation de s'opposer & empescher les larcins & les maladies internes d'un Estat, que de resister aux Estrangers qui s'efforcent d'enuahir ses frontieres.

IX.

Ce n'est assez de s'opposer par les voyes communes à toute sorte de personnes, qui troublent, molestent, ou causent du detrimement au Souuerain ou à son Estat; Mais il y a en outre obligation dans les vrays & les fidelles sujets, d'auoir recours aux extraordinaires, de prendre les armes, & les employer courageusement, lors que les autres moyens ne sont pas suffisants pour la conseruation du bien & du repos public. Cette maxime en suppose beaucoup d'autres, comme, que la guerre pourueu quelle soit legitime n'est point contraire aux Loix du Christianisme; Que les Roys qui n'ont point de Iuge souuerain qu'ils soient obligez de recognoistre pour terminer les difficultez qui concernent leurs Couronnes, peuuent les decider par la voye des armes: & que leurs sujets non seulement les peuuent, mais les doiuent assister, si ce n'est que l'iniustice de leur cause leur fust manifestement cogneüe: Ainsi quand on voit un Estat en desordre, & principalement durant la Minorité d'un Roy; Que l'on voit non seulement les ennemis Estrangers trauailler à sa ruine; Mais encore les propres sujets par les vols, les brigandages, les concussions, & les rapines, piller ce qui reste de la violence des ennemis, & se seruir mesme de ces occasions deplorables, comme de pretexte & de couuerture à leurs iniustices, où il faut renoncer à toutes les maximes de la Politique chrestienne, où il faut

il faut dire qu'il y a obligation de recourir aux armes, & résister par la force à ces ravages, lors que les autres voyes sont inutiles, ou ne sont pas suffisantes pour y remédier.

X.

Et comme la personne des Roys est la chose la plus précieuse & la plus sacrée que les peuples puissent avoir, après celles de la Religion, aussi n'y a-t-il rien qu'ils ne soient obligés de faire & d'entreprendre pour le maintenir dans la sécurité de leur vie, dans la liberté souveraine de leur indépendance, pour empêcher qu'ils ne soient enlevés, ou traduits en captivité, ou pour les en tirer si par quelque occasion ils y sont tombés. Cette maxime ne demande point de preuve, elle est notoire par elle-même: Ce n'est que l'extrait & l'esprit de toutes les autres; ou pour parler plus conformément à la raison, elle en est le premier mobile & le fondement; Car s'il n'y avoit point d'obligation pour ce qui regarde la personne du Prince il y en auroit encore moins, pour ce qui touche les choses particulières de son Estat; & si celles-là exigent par justice & les personnes & les biens pour leur défense, ce n'est que comme par une dépendance & suite nécessaire de ce qu'ils sont tenus de faire pour empêcher ou détruire tout ce qui altère ou diminue les prérogatives essentiellement annexées à la personne du Souverain; Il y a donc plus d'obligation & de devoir de s'en venir & de prendre les armes pour s'opposer à l'enlèvement d'une personne si sacrée, ou pour la retirer de cette violence, qui est une pure captivité, qu'il n'y en a pas pour la défense de tout ce qu'on pourroit s'imaginer au-dessous d'elle.

X I.

De toute ces maximes générales, Chrétiennes & Evangeliques, s'en suit cette particulière comme une

consequence de plusieurs antecédents ; que non seulement Paris, mais toute la France est obligée en conscience de prendre les armes contre le Cardinal Mazarin, pour la conseruation de la personne du Roy, le repos & la tranquillité de son Estat. Vn seul raisonnement le fera comprendre aux plus simples. Tous les peuples sont tenus de s'armer pour defendre leur Prince & son Estat, contre les perturbateurs de son Royaume, qui vsurpent son autorité, qui ruinent ses sujets, qui volent ses finances, qui oppressent les grands & les petits, qui aneantissent la Justice, qui enleuent le Roy & donnent toutes les Marques d'un vsurpateur & d'un Tyran ; Or le Cardinal Mazarin est coupable de tous ces crimes : Il faut donc renoncer au Christianisme si l'on veut se departir de l'obligation que l'on a d'empescher la violence de tant de maux & de si execrables projets. Qu'il ne soit tel que ie viens de le dire, qui est le seul point qui pour estre de fait pourroit faire de la difficulté ? Trois raisons le font voir trop manifestement. La premiere, sont les yeux de toute la France, qui sachant ce qu'il estoit il n'y a que dix ans, voit maintenant l'excez prodigieux de sa grandeur où n'estant pas monté par ses propres facultez, estant certain qu'en ce temps-là il n'auoit pas de quoy s'entretenir & viuoit en partie de trafic, il n'a fait ce grand amas que par ses brigandages sur l'Estat, volant impunement les Finances sous le pretexte de la guerre, laissant perir la milice faute d'argent, cependant que le sang du peuple estoit employé, à ses vanitez, à ses voluptez, & à l'establissement d'une maison Royale, si Dieu ne s'estoit opposé à ses pernicieux desseins.

La seconde, est la violence inouye qu'il a exercée sur la personne du Roy, par son enleuement en pleine nuit, ne donnant que trop manifestement à cognoistre quel est le but de cette entreprise tyrannique

par les sacrileges, les viols, les ruines, & les ravages que depuis trois semaines il fait exercer autour de Paris, par des Monstres d'hommes qui n'ont ny Foy, ny Loy, ny Dieu, ny Religion: Par le fac dont il menace la ville de Paris, & après elle le reste de la France, si elle ne plie le Col sous le joug de sa tyrannie, estant certain que s'il demeure victorieux en cette rencontre de la Capitale de l'Estat, la condition des François sera deormais plus malheureuse que celle des esclaves qui vivent sous l'Empire du Turc.

La troisieme, est l'Arrest prononcé contre luy par nos Seigneurs du Parlement, car il ne faut pas le persuader que cet Auguste Senat, composé de si illustres, si sçuants, si pieux, & si zelez personnages, qui tous les jours tesmoignent par leur conduite admirable, l'affection qu'ils ont pour le bien public, au preiudice de leur interest propre & de celui de leurs familles, se soit porté en cette occasion, avec precipitation & à l'aveugle; Ils y ont procédé avec jugement & maturité; ils n'ont esté que trop instruits de la mauuaise conduite & des pretentions funestes de cet homme, ils ont souffert les violences tant qu'ils n'ont eu pour but que leur personnes particulieres, ils n'ont arme la severité des loix que lors qu'ils ont veu l'Estat dans la crise de sa ruine; & s'ils sont à blasmer en quelque chose, c'est d'auoir trop patience & attendu à donner l'Arrest qu'ils ont enfin esté contraints de prononcer avec tant de Justice & d'equité, qu'ils n'ont point apprehendé d'en donner auis à tous les autres Parlements & à toutes les Prouinces de France.

XII.

Delà sensuit que tous ceux & celles qui luy donnent assistance & appuy, qui luy seruent de Conseil & de soustien, soit de leur personne ou de leurs biens, qui luy prestent ayde ou faueur, & sont cause qu'il n'obeit

point à l'Arrest prononcé contre lui au grand preiudice de l'autorité du Roy, de la liberté & conseruation de sa personne, du bien, du repos, & de la tranquillité publique, pechent mortellement & sont en continuel estat de peché mortel, dont aucune puissance n'est capable de les absoudre, qu'ils ne l'ayent actuellement abandonné, & fait restitution des vols, des ruines, des rauages, & de tous les excez commis en suite de leur conseil pernicieux, & de la faueur protection & appuy illicite, iniuste & tyrannique qu'ils luy prestent.

LA Cour à permis à **CARDIN BESONGNE**, d'imprimer vendre & debiter ce present Liure de *Maximes morales & Chrestiennes.*